

(Untuk Kegunaan Orang Bukan Islam Sahaja)

## **Pemuda Pemudi Orang Suci Zaman Akhir Semenanjung Malaysia Menderma Plasma dan Platelet Darah**

Seruan mendesak untuk menderma plasma dan platelet darah untuk seorang ahli Gereja yang sakit di Pulau Pinang telah dijawab oleh ramai ahli Gereja, termasuk sekumpulan pemuda pemudi dan rakan mereka yang bukan ahli Gereja dari Selangor dan Kuala Lumpur.



Sekumpulan pemuda pemudi, ahli Gereja dan rakan mereka yang bukan ahli gereja dari Daerah Kuala Lumpur Malaysia menderma plasma dan platelet darah untuk saudara dari Cabang Pulau Pinang yang sakit. Selama beberapa minggu, para ahli Gereja datang pada tarikh yang berbeza untuk menderma.

Pengaturan pengangkutan telah dibuat oleh Presiden Royce Tai dari Presidensi Daerah Kuala Lumpur Malaysia untuk kumpulan itu bergerak awal pagi pada hari Selasa, 21 Disember 2021 ke sebuah hospital di Pulau Pinang di mana ahli Gereja yang sakit itu sedang menunggu dengan segera sumbangan plasma dan platelet darah untuk pembedahan jantungnya.

“Kali terakhir saya bertemu dengan saudara yang sakit ini adalah ketika saya masih muda,” kata salah seorang pemuda pemudi yang mengambil bahagian. “Ketika itu, dia adalah salah seorang pemimpin di persidangan remaja di Malaysia. Dia seorang yang sangat bersemangat, menghormati dan memperlakukan semua remaja seperti orang dewasa. Sepuluh tahun kemudian, sekali lagi dia melayani kami dengan membenarkan kami untuk melayaninya dalam masa dia memerlukan. Semasa kita memperingati kelahiran Juruselamat kita Yesus Kristus pada musim Krismas, usaha pelayanan kami melambangkan rahmat Kristus yang menaikkan semangat dan penyembuhan dalam kehidupan seorang saudara yang sakit.”

Bulan Disember dan musim Krismas terbukti menjadi masa untuk memberi dan berkongsi bagi para Orang Suci Zaman Akhir di Semenanjung Malaysia.

Melalui tindakan pelayanan tanpa mementingkan diri, para ahli membawa harapan kepada seorang saudara yang keadaan kesihatannya tidak baik, yang memerlukan plasma dan platelet darah untuk menyokong dan memanjangkan hayatnya. Teladan pemuda pemudi, rakan-rakan mereka yang bukan ahli gereja, serta ahli Gereja yang lain yang tidak terkira banyaknya telah memberkati kehidupan saudara yang lemah ini dan keluarganya pada musim Krismas ini.